

34. Prolis caussa caerimonias sacras peracturus, grave imperii onus, de humeris suis sublatum, ministris imposuit.

35. Tum conjuges casti, mundi auctorem venerati, filii desiderio acti, profecti sunt ad VASISHTHÆ, magistri sui, eremum.

36. Conscenderunt currum, dulce graviterque resonantem, proinde ut fulmen atque AIRÁVATAS eadem vehuntur nube autumnali.

37. Ne eremus turbaretur, paucos tantum comites secum ducebant, sed propter eximiam suam dignitatem quasi exercitu cincti erant.

38. Adflabant eos auræ molli tactu, *sálarum* resinæ odorem spirantes, florum pulverem spargentes, leviterque sylvarum series moventes.

39. Audiebant illi animum oblectantes, *shadjam* referentes, duplices sonos pavonum, qui ad strepitum rotarum caput extollebant.

40. In caprearum paribus, haud e longinquo viam relinquentibus, vultibus in currum defixis, mutuo oculorum suorum similitudinem cernebant.

41. Alicubi facies extulerunt ad dulces sonos gruum, quæ continua serie portæ arcum sine postibus referebant.

42. Propter ventum secundum, qui voti exitum promisit, neque crines, nec vestes eorum fœdabantur pulvere ab equis excitato.

43. Lotorum in lacubus percipiebant odorem, undarum motu refrigeratum, ipsorumque halitui similem.

44. In vicis, ab ipsis conditis, columna sacrificali insignibus, a sacrificis post munera benedictiones accipiebant haud inanes.

45. Butyro recenti accepto, pastores grandævos aggressos interrogabant de nominibus arborum agrestium, ad viam plantatarum.

46. Ambo in candidis vestibus incedentes pulchritudine splendebant, veluti Virginis Spica lunaque conjunctæ, nive liberæ.

47. Rex pulchris oculis præditus, BUDHÆ similis, dum hæc atque illa uxori suæ monstrabat, ne animadvertit quidem, iter absolutum esse.

48. Ille, gloria ægre acquirenda illustris, vesperi, equis lassatis, cum uxore sua pervenit ad magni sapientis, duriter sese domantis, eremum ;